

Mir misse sesommehalle

Su e arsch schee Wedder iss joo omm letzde Somsdaach grad nitt gewese, unn desdeweese hawwe merr nor enn korrze Spaziergong dorschs Feld gemacht, moin Kummbeer Schorsch unn isch. Wie dess su iss beim Laafe, babbeld merr iwwer allershond Zeisch, merr gieht joo longsom unn dut alls in de Geeschend erumgugge.

Uff oomol seet de Schorsch: Waaßde, Honnes, mir lewe innem Lond, wos zimmlisch friedlich zugehe dut. Nodierlich hawwe merr unser Probleme, awwer die sinn doch kloogeesche die Soije, die vill Leit in onnern Länner hawwe.

Wie moonsden dess, Schorsch?, habb isch gefroochd, onn was dusden debei denke?

Mir sinn e paar Meder weidergonge, donn iss de Schorsch stiehgebliwwe unn isch aach unn de Schorsch seet: Ei onn die Sach doo unn in Syrien, dess mett dem Giftgas unn dene ville Doode, mett dene ville doode Kinner. Die vorsch Woch habb isch beim Dokder gehoggd unn in emm Heft erumgeblädderd unn doo habb isch su schreckliche Bilder geseh. Ich musst dess Heft widder hieleesche, weil merr die Träne kumme sinn, unn flenne wollt isch doch beim Dokder nitt, der hädd villeischd gedenkt, isch wär was waaß isch wie kronk.

Ja, Schorsch, saach isch, isch habb su Fotos aach geseh unn isch mussderr saache, aach isch habb Träne in die Aache krieht, awwer mieh noch habb isch enn Zorn krieht, dass die alls weidermache unn kooner iss in de Laach, dene ze saache, heert uff!

Donn sinn merr e Schdiggsche weider gonge unn hawwe im Laafe iwwer die Sach noochgedenkt. Als de Schorsch unn isch widder stieh gebliwwe sinn, hodder soi Händ in die Luft gestreckt unn hott gerufe: Ei mir hawwe doch nor oo oonsisch Welt, warum werrn die Mensche unn aach die Welt kabutt gemacht? Moone die, irschendwonn, wens dene, die noch lewe, hier ze bunt werrd, kennese wo onnersders hie?

Isch guggen oo, weil isch denk, de Schorsch iss noch nitt ferrdisch mett dem wasser saache wollt.

Doo seeder aach schunn: Isch habb vor e paar Daach e Bild innere Zeidungsbeilaach geseh, in Hochglons, dess habb isch merr ausgeschnidde unn uffgehowwe.

Was issen druff uff dem Bild?, habb isch gefroochd.

Die Erdkuuchel, vumm Mond aus geseh, seet de Schorsch, unser Erd mettem blaue Wasser, mett weiße Wolkefetze, mett Lond in Braun unn Grie – unn ringserum iss alles schwarz. Unn als isch merr dess Bild ausgeschnidde habb, doo iss merr oigefalle, wenn alle Leit uff de Welt jeden Moie droo erinnert werrn deede, dass mir su ferrschderlich alloo sinn im Weltall, dass doon ehferrschdisch werrn, geesche-iwwer de Welt unn de Mensche. Moonsde nitt?

Mir sinn donn e bissi weidergonge, bis merr widder stiehgebliwwe sinn unn isch gesaad habb: Isch kenn dess Bild unn du host recht. Merr missts jedem Mensch uff de Welt schenke unn er misst sich dess in soi Haus, ins soi Wohnung odder in soi Zelt hänge, unn su, dass er alle Moie, wanner wach werrd, grad uff dess Bild guggd. Villeischd wanner donn droo denkt, dassmerr werklisch nor oo oonsisch Welt hawwe, dass doon sisch vornomme dut, owachtzabase, dass die ferr alle Mensche gemacht iss?

Moonsde, seet de Schorsch, dass doon ooner soi Gewehr kabutt haache unn soim Geeschner um de Hals falle dut?

Villeischd nitt gleich, saach isch, awwer weil merr su alloo sinn in dem schwarze Weltall fällt emm villeischd doch irschendwonn oi, dass ooner de onnern brauche dut, dass merr sesommehalle misse unn doodemett aach die Welt. Eiern Honnes